

大唐開元禮



大唐開元禮



大唐開元禮卷第八十

賓禮

皇帝宴蕃國主 皇帝宴蕃國使

皇帝宴蕃國主

前一日尚舍奉御整設御幄於所御之殿北壁南向
尚食奉御太官令各具饌守宮設次太樂令設登歌
位於殿上展宮懸於殿庭設舉麾位於上下鼓吹令
設十二案乘黃令陳車輅尚輦奉御陳輿輦竝如常
儀其日尚舍奉御鋪蕃主牀座於御座西南蕃國諸
官應升殿者座於蕃主之後設不升殿者坐席於西

廊下俱東面北上尚食奉御設御酒尊太官令設蕃
主以下酒尊竝如常儀典儀設蕃主版位於懸南又
設蕃國諸官之位於蕃主之後俱重行北面西上設
典儀位於懸之東北如常儀諸衛各勒所部列黃麾
仗屯門及陳於殿庭太樂令帥工人二舞入就位協
律郎入就舉麾位所司迎引蕃主至承天門外通事
舍人引之次凡蕃客出入升降皆掌客監引所司入奏鉞戟近仗入
陳如常典儀贊者先入就位侍中版奏請中嚴諸
侍衛之官各服其器服符寶郎奉寶俱詣閣奉迎蕃
主服其國服出次通事舍人引立於閣外西廂東南

蕃國諸官各服其國服立於蕃主之後俱東面北上
侍中版奏外辦皇帝服通天冠絳紗袍乘輿以出曲
直華蓋警蹕侍衛如常儀皇帝將出仗動太樂令令
撞黃鍾之鐘右五鐘皆應協律郎舉麾鼓祝奏太和
之樂鼓吹振作

凡樂皆協律郎舉麾工鼓祝而後作偃麾戛鼓而後止

皇帝出

自西房卽御座南向坐符寶郎奉寶置於御座侍衛
如常儀樂止典儀一人升立於東階上贊者二人立
於階下俱西面通事舍人引蕃主入蕃國諸官從入
蕃主入門舒和之樂作蕃主至位樂止其有獻物則
從入陳於蕃主之前以西爲上立定典儀曰再拜贊

者承傳蕃主及蕃國諸官皆再拜侍中承旨降勅蕃

主升座蕃主再拜蕃主奉贄

其贄隨其國所有以一輕者爲之

曰某

國蕃臣某敢獻壤奠侍中升奏又侍中承旨曰朕其

受之侍中降於蕃主東北西向稱有制蕃主再拜宣

制訖蕃主又再拜訖以贄授侍中侍中以贄授所司

又所司受其餘幣俱以東舍人承旨降勅蕃國諸官

等坐蕃國諸官俱再拜通事舍人引蕃主又通事舍

人引蕃國諸官應升殿者詣西階蕃主初行樂作至

階樂止通事舍人各引升立於座後初蕃國諸官詣

西階其不升殿者通事舍人分引立於廊下席後立

定殿上典儀唱就座階下贊者承傳蕃主以下皆就位俛伏坐太樂令引歌者及琴瑟至階脫屣於下升就位坐其笙管者就階閒北面立尚食奉御進酒至階殿上典儀唱酒至興階下贊者承傳蕃主以下皆俛伏興立座後殿中監到階省酒尚食奉御奉酒進皇帝舉酒良醕令又行酒殿上典儀唱再拜階下贊者承傳蕃主以下皆再拜訖搢笏受觶殿上典儀唱就座階下贊者承傳蕃主以下皆就座俛伏坐飲皇帝初舉酒登歌作昭和三終尚食奉御進受虛觶奠於坵登歌訖降復位觴行三周尚食奉御進御食食

升於階殿上典儀唱食至興階下贊者承傳蕃主以下皆執笏俛伏興立座後殿中監到階省案尚食奉御品嘗食訖以次進置御前太官令又行蕃主以下食案設訖殿上典儀唱就座階下贊者承傳蕃主以下皆就座俛伏坐皇帝乃飯休和之樂作蕃主以下皆飯御食畢樂止蕃主以下食訖尚食太官俱徹案又行酒遂設庶羞二人以次入作若賜酒舍人前承旨詣受賜者前蒙賜者執笏俛伏起立座後舍人稱賜酒蒙賜者再拜酒至蒙賜者搢笏受觶就席俛伏坐飲卒觶俛伏起立受虛觶又再拜就席俛伏坐會

畢通事舍人贊蕃主以下興蕃主以下皆俛伏興立
座後通事舍人引降樂作復懸南位樂止其廊下者
通事舍人引復懸南位立定典儀曰再拜贊者承傳
蕃主以下皆再拜若有筐篚舍人前承旨降宣勅蕃
主以下皆再拜太府帥其屬以衣物以次授之訖蕃
主以下又再拜通事舍人引出樂作出門樂止侍中
前跪奏稱侍中臣某言禮畢俛伏興還侍位皇帝興
太樂令令撞蕤賓之鐘左五鐘皆應奏太和之樂鼓
吹振作皇帝降座乘輿入自東房侍衛警蹕如來儀
侍臣從至閣樂止

皇帝宴蕃國使

前一日尚舍奉御設御幄於所御殿之北壁南向太
官令具饌守宮設使者次太樂令展宮懸於殿庭設
舉麾位於上下竝如常儀若大蕃中使小蕃大使等以下則不設樂及黃麾仗
其日尚舍奉御鋪使者牀座於御座西南設不升殿
者坐席於西廊下俱東面北上典儀設使者位於懸
南重行北面東上設儀贊者位於懸之東北如常
儀諸衛各勒所部列黃麾半仗屯門及陳於殿庭太
樂令帥工人二舞次入就位所司迎引使者至承天
門外通事舍人引就次所司入奏鈸戟近仗入陳如

常典儀帥贊者先入就位侍中版奏請中嚴諸侍衛之官各服其器服符寶郎奉寶俱詣閣奉迎蕃使以下服其國服出次通事舍人引立於閣外西廂東面從者立於使者之後重行東面北上侍中版奏外辨皇帝服通天冠絳紗袍

不設樂者則常服

乘輿以出曲直華

蓋侍衛警蹕如常儀皇帝將出仗動太樂令令撞黃鍾之鐘右五鐘皆應協律郎舉麾鼓祝奏太和之樂

凡樂皆協律郎舉麾工鼓祝而後作偃麾戛鼓而後止

皇帝出自西房卽御座

西向坐符寶郎奉寶置於御座侍衛如常儀樂止典儀一人升立於東階上贊者二人立於階下俱西面

典儀引使者以下入就懸南位使者初入門作舒和之樂至位樂止立定典儀曰再拜贊者承傳使者以下皆再拜舍人前承旨降勅使者升座使者以下皆再拜通事舍人引應升殿者詣西階樂作止如常通事舍人引升立於座後其不升殿者分引詣廊下席後上下立定殿上典儀唱就座階下贊者承傳上下諸客各就座俛伏坐酒至階殿上典儀唱酒至興階下贊者承傳上下諸客皆俛伏興立座後太官令行酒殿上典儀唱再拜階下贊者承傳上下諸客皆再拜搢笏受醵殿上典儀唱就座階下贊者承傳蕃使

以下諸客皆就座俛伏坐飲觴行三周食升階殿上
典儀唱食至興階下贊者承傳上下諸客皆執笏俛
伏興立座後太官令行諸客案設食訖殿上典儀唱
就座階下贊者承傳上下諸客皆就座俛伏坐上下
諸客皆飯諸客食訖太官令俱徹案又行酒遂設庶
羞二舞以次入作若賜酒舍人前承旨詣受賜者前
蒙賜者執笏俛伏起立座後舍人賜酒蒙賜者再拜
搢笏受觶就席俛伏飲卒觶俛伏興立授虛觶又再
拜就席俛伏坐會畢通事舍人贊使者興上下諸客
皆俛伏興立座後通事舍人引使者降樂作復懸南

位樂止其廊下者分引復位立定典儀曰再拜贊者承傳使者以下皆再拜若有筐篚舍人前承旨降宣勅使者以下又皆再拜太府帥其屬以衣物以次授之訖使者以下又再拜通事舍人引出樂作出門樂止侍中前跪奏稱侍中臣某言禮畢俛伏興還侍位皇帝興太樂令令撞蕤賓之鐘左五鐘皆應奏太和之樂皇帝降座乘輿八自東房侍衛警蹕如常儀侍臣從至閤樂止

大唐開元禮卷第八十

大唐開元禮卷第八十一

軍禮

皇帝親征類于上帝

纂嚴

齋戒

陳設

鑾駕出宮

奠玉帛

進熟

鑾駕還宮

纂嚴

纂嚴前一日本司承制宣攝內外諸司各隨職備辦
尚舍奉御施御幄於太極殿北壁下南向如常守宮
設羣官文武次於東西朝堂如常儀典儀設羣官位
於殿庭文武東西每等異位重行北向相對爲首乘

黃令陳革輅及玉輅以下及車旗之屬如常 未明一刻開諸宮門諸衛勒所部列黃麾仗屯門及陳於殿庭如常儀其日平明畱從之官悉集朝堂次侍臣服平巾幘袴褶其將帥等及從行之官亦平巾幘袴褶畱守之官公服上水五刻侍中版奏請中嚴鉞戟近仗以次列於殿庭上水三刻通事舍人引羣官以次就位諸侍臣俱詣闕奉迎侍中版奏外辦皇帝服武弁之服御馬以出曲直華蓋侍衛警蹕如常卽御座南向坐典儀唱再拜羣官在位者皆再拜訖中書令承旨勅百寮訖通事舍人以次引羣官出侍臣跪

奏禮畢俛伏興皇帝降御座入自東房侍臣從至閣如常禮

齋戒

將告有司卜日如別儀 前一日皇帝清齋於太極殿諸與告之官清齋於告所侍從之官應從升者及羣官客使等各於本司及公館諸軍將各於正寢俱清齋一宿

若在營者
齋於軍幕

晡後一刻諸衛令其屬各以其

方器服守衛壝門與太樂工人俱清齋一宿

陳設

前告三日尚舍直長施大次於外壝東門之內道北